

ROBERT JEANDO'R.

Rey di tumba 1978.

Mientras cu hopi di nos cantante nan ta keha cu e pueblo di Aruba no ta coopera cumprando nan disco, un di nos cantantenan cu ta leuw di e problema ey sin duda ta Robert Jeando'r, cantante di Combo Los Juveniles. Su disconan entre otro: Mi kier ta un mucha, Slipe, Bolonbonchi y un cantidad mas pa menciona, dentro di tres siman caba ya cu nan a sali ariba plaza ta wordo uitverkocht den tur skina di Aruba, mientras cu di Corsow tambe pedida pa su disconan continuamente ta dreña. Kende e cantante aki ta, cu ya pa tres biaha caba a ser corona como rey di tumba? Kende e cantante aki ta, cu su canto y actuacion tabata sabi di manipula henter e presentenan durante e tumba contest na stadion na su fabor?

Revista Boulevard kende kier a conoce e persona aki di serca por a logra un entrevista cu e joven cantante aki, cual no a bai asina facil pa localise pa motibo di hopi compromiso cu e tin hunto cu Los Juveniles pa cumpli cu ne.

"Despensa mi, cu mi a laga boso warda asina tanto," Robert Jeando'r hariendo a cuminsa ta saludando nos. "Esey ta debi na e cantidad di toca cu nos ta tin durante fiestan di Carnaval, pero mi ta contento cu boso a aserca mi pa un entrevista," Robert contento ta bisando. Den un sala cu un cantidad di trofeo cu Robert a logra di conquista hunto cu Los Juveniles nos a cuminsa nos combersacion cu Robert Jeando'r.

"Mi ta kere cu mi ta gusta musica, door cu mi a erf esaki for di mi ta-



ta kende cuatro aña pasa a fallece. Mi tata tabata un guitarista cu ta tin amor pa musica, Robert a cuminsa ta conta nos, e la jega di toca cu varios musiconan conoci, entre otro cu Julian Coco. Tambe mi defunto Tata tabata toca klarinet, mihor bisa e ta un musico completo. Mi tata tur atardi ta siña mi toca cuarta y tambe iesa musica. Cu mi seis aña mi a bin toca den un grupo di aguinaldo cu tabata hiba e number di Blancas Palomitas y tambe cu Alma Solis, na cual asina mi a cuminsa gana mi prome experimentonan musical. Tambe, ami hunto cu un ruman homber di mi a jega di actua bouw number di Duo Jeando'r. Mayoria parti mi a toca den un grupo di aguinaldo bouw di e mes un manager cu nos tin awor, cual ta Victor Oduber. Awor lo mi bai conta bo, con mi a cuminsa cu Los Juveniles," Robert ta bisando nos. Tabata den tempo cu Juveniles mester a

cambia di basista y algun tocador, na momento cu e director di Los Juveniles a aserca mi, pa mi bai juda nan solamente pa un luna. E final di e luna no a jega te dia di awe, Robert hariendo ta bisando, pasobra bo mes por mira cu te awe ainda mi ta actuando cu Los Juveniles.

Robert Jeando'r en total a participa cinco biaha na e concurso di tumba. E porme vez, Robert no ta tin e di tanto suerte ey y e no a logra finalisa entre e di tresnan. Pa di dos vez cu Robert a competi, e ta tin un poco mas suerte y a sali number tres den e contest di tumba. Pa e tres añanan cu a sigui cual ta 1976, 1977 y 1978 Robert Jeando'r tabata sabi na un manera fantastico con pa gana e concurso di tumba. E ultimo tumba cu Robert a triunfa cu ne tabata, Mi bolonbonchi, cual tumba a wordo composita pa su mes persona, mientras cu e arreglo

ta di Victor Thode, y e banda cu a compaña Robert tabata, Combo Los Juveniles. "Loque si ta duel mi hopi te ainda ta lo siguiente, Robert na un manera calma ta bisando, cu mi tata kende tabata un gran persona pa mi, como cu te a yuda mi cu tur su esfuerso cu awe mi ta tocando, no ta tin e honor pa por a keda na mundo, pa por a mira of goza di e éxito cu mi ta logrando ultimo. Mi talento, mi tin cu gradici esey na mi tata," Robert ta bisando aserca. E mas tristo ta, cu e mes casi nunca a mira mi den un actuacion. Tur ora mi ta pensa den mi mes, cu mare mi tata ta na bida, pa e por realiza kiko su sacrificio cu e la haci cu mi, pa síña mi toca, a logra."

Robert, kiko bo ta opina cu durante e película di carnaval pasa ultimo na Tele Aruba, bo tumba Bolonbonchi no a wordo toca?"

"Awel, laga mi cuminsa na bisa esaki, cu den e reglamento cu SAC a stipula, ta para cu tanto e tumba ganador y e roadmarch mester wordo toca. Pero realizando esaki door cu mi a tende di hopi hende mes, cu durante e parada grandi casi ningun banda a toca Bolonbonchi. Ta tin dos banda cu mi sabí cu a toque sigur, mas tanto nan ta toca Miti y tambe e calypso "Pa bo so". Ami mes, durante e parada a canta tanto Bolonbonchi y Miti y tambe Pa bo so. E otronan mas tanto a toca Miti. Ami mes no kier culpa ningun hende di esaki, pa motibo cu durante e temporada di carnaval tur e bandanan tabata hopi druk mes, pa por a haya chens pa nan train e tumba Bolonbonchi. No lubida cu e calypso contest a wordo teni mucho mas tempran cu e tumba contest, na cual e bandanan musical por a haya mas chens pa practica esey. Pero si mi ta keda ariba mi palabra, cu nan mester schuif e festival di tumba pa un di e prome evenementonan di carnaval pa asina duna e bandanan mas chens pa practica e tumba ganador. Cu Tele Aruba tampoco no a toca Bolonbonchi, talvez nan tin motibo pa esey. Talvez nan no tin e disco," Robert ta bisando. "Pero si ta esey ta e motibo, nan por a aserca mi pa



uno, of nan por a grabe na momento cu e ta tocando na un di nos emisoranan. Pero, pa mi tur cos a keda mescos, aunque lo tabata algo grandioso, si nan a toca Bolonbonchi ya asina mi fansnan tambe a keda complace. Pero mi ta bisa bo atrobe, cu no ta pa malo Tele-Aruba a keda sin toca Bolonbonchi, pero a nan talvez tin nan motibo," Robert Jeando'r cu un hari ariba su cara ta bisando. Robert, tin un noticia ta core rond cu bo a wordo aserca pa bai actua cu un banda musical di Venezuela, lo bo kier conta algo ariba esaki?"

"Si, ta berdad, Robert ta bisando, pero esey ta aña pasa caba. E invitacion ey a bin di un di e musiconan di La Banda kendenan ta tocando na Venezuela, cual persona a sali for di La Banda y kende ta kier a lanta su mes un grupo musical. E persona ey kende a yega di mira mi den actuacion hunto cu Los Juveniles, ta tin varios combersacionnan via telefoon cu mi persona pa mi bai Venezuela, pa mi toca y canta pa e grupo nobo cu e lo bai forma. Pero semper ta bon, prome cu bo acepta algo pa busca mas informacion pa mas seguridad. Despues di a busca mas informacion di nan mi a bin atras cu algo somewhere no ta klop y cu hasta si mi a bai toca cu nan, lo mi por a bai sera of haya mi den cuenta di gobierno.

NA 1979, ARUBA TA
CUMPLI 25 AÑA CELE-
BRANDO CARNAVAL.
BAN COOPERA PA
HACIE UN CARNAVAL
NUNCA VISTO
DEN HISTORIA.

Nan tabata kier pa mi mes paga mi pasashi pa mi bai Venezuela. Figura bo, si mi mester a bai y e asunto no a bai di e bon ey, e ora mi a keda sin trabou y ademas bo tin cu comprende cu ta ariba un pais es-tranhero mi ta. Naturalmente, mi a keda hopi contento cu e oferta, pasobra mi tambe kier bai dilanti den mi bida. Pero por lo pronto lo mi keda cu Los Juveniles y ken no sabi cu cualquier dia un bon oferta lo por drenta atrobe," Robert hariendo ta bisando nos.

Actualmente Los Juveniles ta pensa di bin cu un disco nobo 45. Tambe Los Juveniles actualmente ta preparando pa bai afor pa graba un long-play como celebramento di nan 10 aña di existencia, na cual nan ta spera cu por tin casnan comercial cu por contribui cu un judansa pa asina nan logra e grabacion ey. Di e concurso di tumba pa otro aña den temporada di Carnaval, Sr. Robert Jeando'r ta bisa lo siguiente: "Cu lo mi participa otra aña atrobe na e contest di tumba," te ainda ta pendiente, Robert cu calma ta bisando, como cu hopi hende ta conseha mi, pa laga dos aña pasa prome cu mi competi atrobe. Pero no ta para ningun caminda si, cu mi no mag di participa mas como ya

mi a gana tres biaha caba. Pero di otro banda mi ta tende cu lo mi actua pero como invitado, mientras cu for di Edwin Zichem mi a tende, cu otro aña lo bai tin un tumba contest di Antillas y cu nan ta loco pa mi participa. Pero pa mi logra participa na e tumba contest di Antillas, mi mester logra sali entre e

tres ganadornan di Aruba. Mi mes ta haya esaki un poco fastioso," Robert ta bisando, pasobra si mi no logra cualifica, mesora e hendenan ta bisa, hepa, bo a mira, Robert Jeando'r a faya caba, e no ta sirbi mas. Nan no ta comprende cu si bo perde, cu no ta abo of e banda no ta bon mas, pero cu ta e cancion of

e tumba cu bo a participa cu ne, a perde. Pero te ainda m't no sabi ta kiko ainda," Robert cu un stem abouw ta bisando, pa despues cu un poco mas presion den su voz ta bisa: "Pero mi ta kere cu lo mi participa sigur atrobe. Si mi tin sigur participa lo mi participa atrobe otro aña.

LES AIGLONS

LES AIGLONS. Un grupo musical di Guadelope consistiendo di 15 musico, a sabi di trece miles di hende den Nassaustraat, pa presencia nan concierto den aire liber dilanti Aquarius Boutique. Miles di hende a wordo domina pa Les Aiglons cu nan ritmo yen di temperamento y cu nan canto den nan idioma patuá, un idioma cu bo ta keda mes leuw cu ne, pa motibo cu bo no por comprende e idioma aki, treci pa prome vez den historia di Aruba pa Les Aiglons. E grupo Les Aiglons a wordo contrata pa Lando Garcia, cu cooperacion di Sr. Wilfred Ho Sing Loy. Tabata Sr. Irvin Tauber kende den nomber di Aquarius Boutique a ofrece e concierto den aire liber cu Les Aiglons, como un regalo na e pueblo di Aruba. Atrobe tanto Sr. Wilfred Ho Sing Loy y Sr. Irvin Tauber kende nan tabata sabi con pa coopera cu nos festividadnan carnavalesco.

